

中華民國十五年五月卅日

新

民

氣

(英帝國排華概況)

中華國民必讀


炎培

華僑郭紹周

合著

合著

上海圖書館藏書



A541 212 0009 2572B



新民氣

蓋聞天下之興亡、匹夫與有責焉、苟生當昇平之時、吾人猶可稍爲寬緩、無如今日爲中國最不幸之時期、亦爲我族最窮困之時代、吾人憂於內亂、激於外患、睹華族之不振、視異族之猖狂、有不奮然而起、勃然而作、以求興我中華、雪我國恥者乎、我國數十年來、與英日諸國相見於疆場也、戰無不敗、攻無不失、割地賠款、積成故事、嗚呼、我先民忠義之氣、武烈之風、幾已一去而不復返矣、幸自上海血案發生以來、民氣大振、海內外同胞、頗能協力同心、一致對外、此正所謂殷憂啓聖、多難興邦者也、惜夫爲時未久、愛國之熱度驟減、鴻等國民義務所在、敢不竭盡棉力、將外人歷來虐待華僑之實情、歷陳於邦人君子之前、以求保持同仇敵愾之心乎、惟願誠動乎中、義發於外、舉國努力、萬衆一心、共發興邦之志、勵行對外之策、則數年以內、其效自見、非特每年挽回鉅萬之漏卮、又可以興我百業、裕我民生、固我國基、而富我邦家也、

外人之侵略壓制政策

今之曾遊南洋英荷屬地者、當知我僑胞所受之痛苦矣、僑民所受之待遇、直與亡國賤種相似、在法律上則不能與耶穌教所謂上帝驕子之白種人取得平等之待遇、僑民勞苦力作、有

重稅相逼迫、偶一犯禁、則身繫囹圄、時或如虎之警官、大罵支那賤種、又或黑面之警察、喊叫叱斥隨之、嗚呼、亡國奴之不如、喪家狗之不及、人孰無良、焉有見之而不憤、聞之而不怒者乎、若夫英領澳洲、Australia 則二十五年前、即厲行排華、嚴禁華人入境謀生、當是時也、英人與中國通商、獲利無算、聞澳洲不顧中英商約、而悍然禁止華人入境、頗慮我國之有所作爲、致英國商業、受其影響、不料前清政府、置之不聞不問、吾國人民、亦夢夢然無知覺、於是英人乃額手稱慶、知中國之可欺、明目張膽、視漢族如散沙、我四萬萬同胞、惟知忍受欺陵、吞聲飲恨而已、不知者或謂我人方臥薪嘗膽、苦心經營、以謀雪此國恥、滌此大辱也、昔者勾踐十年生聚、十年教訓、卒以滅吳、今者我國人民、或亦如斯乎、然而二十載之期已過、乃不見雄飛之舉、民國成立十五年、至今尙依然故我、嗚呼同胞、此時不起、更待何時、夫澳洲本黑種人之土地也、英人得之、則殘殺土著、至今黑人已滅亡殆盡、惟北部炎熱不毛之地、乃見其蹤跡耳、澳洲面積三百萬方哩、幾等我國四分之三、而其人口、僅達五百餘萬、不及我福建一省人口、此地大物博之澳洲、乃爲區區五百餘萬之白種人所霸占、英人不能從速增加其人口、以開發其土地、反厲禁華工之入境、以絕我民之生路、其處心積慮、於此可見、且也、民國紀元前八年、

西部澳洲竟頒訂法律禁止華僑開設工廠並禁各廠僱用華人澳洲各地則有仇華會其會員以萬計專以排斥華人及華貨爲宗旨三十年前此風尤熾澳洲紐卡色諸埠英裔竟至與全體華僑絕交並抵制商人之售華貨及廠主之僱用華僑者嗚呼僑胞受英人之欺陵我民乃無同仇敵愾之心當時本應我民抵制英貨以表示反對之心不料澳洲英人見我民之可欺反變本加厲排斥華人必欲絕我在澳僑民之生路天下事之顛倒誠莫過於此矣今者排華之風稍殺然此非英人之放下屠刀乃因華僑之人數已大減不足以惹英人之忌嫉也然而陵侮中國人之心幾成彼族之遺傳性雖三尺童子亦知鄙視華人澳洲政府辦事員英人黑利阿氏 Harry Heller 竟嘗當衆大罵中國工人爲臟狗且謂中國人數千年來生來便是污穢近之則令人欲嘔云云嗟嗟不知我海內外同胞聞之將作何感想英人既力抑我在外僑民之生計復在我國劫取特權廣售洋貨以吮取我金錢而阻礙我實業之發展使我國失業人民有增無減是非欲以經濟亡我國而何數年前澳洲英人見東方市場之大可染指也乃年費萬金廣置商務委員以謀推廣其商品之銷路以是鮮果也牛油也餅乾也皮革也漸出現於我國及南洋之市場我國人亦購之惟恐不亟而不悟製售此貨者乃極端排斥華人

者也、嗚呼、青青不伐、將尋斧柯、涓涓不塞、將成江河、我海內外同胞、盍乘機而起乎、苟自今以後、我民一心一力、不復購用外國運售之嗜好品、如烟、酒、及罐頭食品之類、又凡外國製造品、苟係我國所能做製者、亦皆舍洋貨而用國貨、則每年可挽回數萬萬元之漏卮、外人雖用不平等條約以束縛我國、致海關不能課洋貨以重稅、以保護我國之實業、其如我民之不受外人之挾制何、嗟夫同胞、見兔而顧犬、亡羊而補牢、未爲晚也、語曰、衆志可以成城、又曰、精神一到、何事不成、孟子不云乎、一簞食、一豆羹、得之則生、弗得則死、噓爾而與之、行道之人弗受、蹴爾而與之、乞人不屑也、今外人之辱我國家、欺我同胞、何止噓我乎、我堂堂中華民國、詎能靦顏受之、又詎能復以金錢購之乎、况夫外人既得我金錢、則用之以製軍艦槍炮、以恐嚇我乎、苟吾民尙有悞認英人爲善待吾人者、則請視澳洲僑生陳某之事、陳某生長麥爾鉢埠、奉耶穌教、英語嫻熟、服務於英人所辦之某公司、蓋該行唯一之華員也、該公司在我國設有分行多所、以牟我國之利、不料其在澳之辦事人員、以陳某之爲華人也、恥與之同事、竟至逼其辭職、嗚呼、該公司在我國、吮取我金錢、窮困我百姓、而在澳洲復不能容一僑生、英人之心、何其毒也、今者澳洲華僑、惟有資本人者、乃能立足、否則雖欲爲英人之牛馬、亦不可得也、悲夫、

我中華國民既難得政府之保護，又不圖團結以自強，乃徒令時機錯過，而不自奮拔於泥淖之中。海內外有識之士，又何忍而不舉手相援，彼英人既欲在我國商場上攘取絕大利權，乃乘我國稅關之不能自由制稅也，苦心經營，將種種消耗品，如鮮菓也、牛肉也，及其他飲食品、奢侈品，用置有冷藏室之輪船，自澳洲 AUSTRALIA 及加拿大 CANADA 諸處運載來華，以與我國農工爭利，而同時英國殖民地對於我國運售之物，如茶葉及花生、藤椅等，皆課以極重之稅，若藤椅及花生之稅，且較原價重數倍，斯舉也，實何異於禁止我國貨之入其境也乎。無怪乎我國實業之難於振興，而我民之常處窮境也。當歐戰之時，我國亦嘗附和英美等國矣。逮歐戰告終，德國在南洋之屬地，多歸英國統轄，英國一得德屬巴布亞 PAPUA，便重施其在澳洲所行之政策，意欲滅絕巴布亞土人，而同時限制華人之生路，嗚呼，揣英人之用心，直欲全球六大洲，盡成白人之繁殖地，而普天之下，惟英人爲獨尊也。苟我民不急起以圖自衛，則將來何堪設想。試觀加拿大之英人，施行四十三條苛例，蔑視華僑人格，凡屬中國人，不論仕商遊讀，俱須赤身露體，受其查驗，且須納入境稅五百元，方得登陸，而英領南非洲 SOUTH AFRICA之白種人，則尤視我族爲賤種，雖衣冠整潔，亦不得乘頭等火車，又該地

之電車、特作兩層、上層露頂、受赤日之暴、風雨之侵者、專供華人與黑奴之用、其有意侮辱我族、可謂至矣、而其耶穌教青年會所設之寄宿舍、亦不准中華遊客一宿、試問在華之外國傳教士、口談博愛平等、並行小善小德、希圖掩蓋外人之劣蹟、以蒙蔽吾民之耳目者、將如何置答、又英京華僑偶有犯烟禁者、則全英帝國報紙極力形容其醜狀、詆爲華族之劣性、曾不稍憶、當初用武力強迫我國、准此萬惡之鴉片入口銷售者、固係英國也、嗚呼同胞、苟至今未能醒悟、則夫復何言、若夫美國人、則固英國人之後裔也、其所行之政策、亦大致與英相同、菲利濱檀香山諸島、一落美國手中、便嚴禁中國人入境謀生、美國固世所謂酷愛自由、酷愛平等者也、然其種種假面具、竟爲留美陸軍學生王君光等所揭破、事載留美學生季報中、茲特錄之、以饗國人、而美國人對於中國人之真感情、亦於此可以窺見一斑矣、

「王光於民國十年渡美習陸軍、入費省陸軍學校、同學者尙有廣東劉鄭黎三君、不意該校情形、卑劣異常、該校學生對於黃人排斥特甚、輒無故加以毆打、鄭黎兩君、嘗被打昏去、光受虐尤甚、不堪入耳之罵聲、如黃色之苦力、卑賤之黃人等等各種辱語、無日無之、甚至膳室內無人願與之同桌、光等以此得領略亡國奴之况味、然以其足以固我國

家主義、長吾敵愾、勵吾心志、是以居之一年、但以該校情形、實無繼續入阱之必要、軍官多該校畢業生、對吾國人與諸生同一態度、最緊要之炮兵科、吾國人不得選擇、或有往告以內中情形、請求退學者、輒以告移民局、遂回中國爲恫嚇、光等一載光陰、已不復返、然生平壯志、以此益堅、國人誌之、種族歧視、決不能泯、戰爭之禍、終不能免、非投袂奮起、無以競存、清華學生、前後往該校者頗多、率三數日知難而退、越窗而逃者、亦有之、然多效金人之緘口、默不作聲云云、

嗚呼、觀美國人民此等舉動、則其居心之不善、昭昭然可見、鴻等亦嘗至澳洲維多利亞省議會附屬圖書館、見其中有澳政府發給駐澳英兵之書籍、顯然以中國及日本爲英國人種將來之大敵、視該書著作者之國籍、則美國也、然而美國人固亦有自稱與我國親善者也、試觀其退還庚子賠款事、則美國對華之感情、似較他國爲優矣、然而庚子賠款、固係外人過分勒索、拳匪之亂、外人所受之損失、實遠不及其所索賠款之鉅、美國以求爭得我國商場上之勝利、乃允將我國未付清之庚子賠款、大半用以資助留美學生、以籠絡吾民心、是以美國政府雖云不受我未付清之賠款、而美國人民、仍可由我國留美學生之費用、實得其益、同時美國

可以博得我國民之歡心，俾其在華之商業，可以發展，其計亦可謂黠矣，然而吾人苟視其所爲，觀其所由，察其所安，則美國雖狡，又安能欺我哉？又安能欺我哉？

美國遠東商務局局長兼喬日坦大學遠東經濟情形講師、耳德力氏所著之「亞洲貿易」一書，有述美國必須在中國發展商業之原因，茲特譯之如左：

美國之工業，因國外貿易之發展，而進步甚速，美國工人之生活，因之而日益優美，良堪誇炫，然而美國實業家，必須力求增加其出口貨，以維持現狀，庶工人之生活，不致底落。今美國在遠東有絕大之希望，僅取中國及印度而論，苟美國能應其六萬萬人口之需要，則美國工人，不患無工可做，而工人之生活程度，可以日益增高，美國所得利益，豈淺鮮哉云云。

觀此，則美國之所以求擴充其商業於我國者，莫非欲從中取利，庶將來可以維持數百萬之美國工人於豐富之鄉也，以美國生活程度之高，其工人一日之工資，可養我國工人十餘名，若此，則數百萬之美國工人，非奪取數千萬中國工人之生活不可，而同時全球美國領土，嚴禁我民入境謀生，試問我數千萬失業之工人，將於何處餬口，有不流爲乞丐，變爲盜賊者乎？

嗚呼、若斯則四萬萬同胞、將從何處得安寧、外國人既欲藉商業以奪我數千萬工人之生活、又可以因之而擾亂我四萬萬同胞之安寧、使中國永無富強之望、爲外人計、固屬一舉兩得、顧爲國人計、則禍莫甚於此者矣、苟吾民尙不極力提倡及振興本國之實業、舉凡舶來品之能用國貨代替者、皆舍洋貨、而用國貨、則百年以後、吾民其尙有瞧類乎、須知英人之征服印度、實從商業着手、前車覆轍、後車可戒、今我國固尙號稱獨立、而我民亦多視國如家者也、雖云國事紛擾、致賢者多隱匿山林、自潔其身、然而忠義豪俠之氣、至今尙存而未絕、黃花崗上之烈士、碧血造成新共和、嗚呼、有如斯舍身爲國之人民、何患國之不強、苟更出其毅力以振興實業、何患國之不富、迺者我國適得其反、豈非由於我民之未窺其門徑乎、試觀民國十年及十一年之海關進口貨表、英美諸國輸入我國之布疋、煙酒食品器用等物、每年約值海關銀五萬萬兩、約合大洋七萬五千萬兩、此僅算我國所能自產及能做製之貨物、而未包括機器藥品及凡我國所未能自產、及做製之貨物者也、嗚呼、我政府因受不平等條約之束縛、不能隨意增加稅率、以減少此等貨物之進口額、致使外人每年攫去七萬五千萬兩之大利、試問年年如此、歲歲若斯、有不因之而貧乏者乎、且也外人復在我國奪取沿海及沿江之航權、

以與我國航業競爭、又復廣設銀行、發行紙幣、既侵犯我國之主權、復攘取我民之金錢、此事若在人民開通之國家、則雖政府無力抵抗、其國民亦早已設法對待、使其消滅於無形之中、又安能如在我國之根深蒂固哉、今試單就各種煙類而論、民國十年進口額、共值大洋五千九百九十三萬元、民國十一年則達六千三百六十一萬元之多、若在民智開通之國家、則凡稍有血氣者、當知吸英美諸國輸入之煙之不當、而又可恥矣、試思我國年費六千餘萬元之鉅款、以養彼鄙我辱我之外國農工、而同時我顛連無告之兄弟姊妹、因失業之故、而轉死溝壑之中、此事雖三尺童子、亦皆知其不當、不過我國人民未察、遂致讓外人之以我為魚肉也、試問今日文明國之國民、有肯讓外人侵奪其利權者乎、今外國銀行、在我國廣發紙幣、以操縱我國之經濟、若在民智開通之國家、則其國民當亦早已徐圖防止之矣、存款於外國銀行、且不屑為、又豈肯在本國通用外國紙幣哉、嗟夫、吾今而知一國之強弱貧富、悉視其國民之愛國心為何如也、在國家主義盛行之國、其國民非特用必擇物、且旅行亦必擇其舟車、就航行而論、苟有外國輪船、與本國輪船爭利、自當搭本國之輪船、非遇不得已時、決不肯搭外國輪船、蓋若本國航業發達、則凡受其大利者、皆本國人也、一旦國家有難、則政府立能用其輪

船以供運輸之用、福國利民、不亦善乎、夫富強之國民、尙且如此、我貧弱之中華民族、更不當如斯耶、又況夫我國民此舉、純係自衛性質、所以防止外人之侵略者乎、

外人得寸進尺、得尺進丈、苟不極力防止、吾人將無以自存。今者美國人復強逼菲律賓華商、用英文記賬、而不得用華文簿記、違者視爲犯法、勒令出境、嗚呼、美國嚴禁華人入境謀生、尙不以爲足、又復用盡心思、設法將已在境內之華僑驅逐出境、設使華僑服從苛律、忍受此一番束縛、則營業之費既大、謀生之計愈艱、步步荆棘、則不如出境、他適之爲愈也、觀此則美國人之舉動、無非處處欲絕吾民之生路、而同時又刁求在我國擴張商業、以吸盡我民之精華、我同胞爲身家計、爲子孫計、亟宜合力自衛、自衛之法無他、在於我民之合力振興實業、廣用國貨、而不用外國貨之可以、用國貨代替者、誠能若是、是亦足矣、他若機器及化學藥品、凡可以供生產之用者、外人售之、得相當之報酬、吾人得之、可以用以生利、售者購者、兩得其益、吾人不當抵制、即抵制亦與我國無益也、然若煙、酒、布疋、鮮果、餅乾之類、乃外人乘我國海關不能自由制稅、而來奪我農工之生活者也、吾民不得不力加防止、其他如銀行及航業保險公司等、吾人爲自衛計、當極力襄助本國人所設者、以免外人之奪我利權、蓋外人若在我國得

勢則彼將長爲刀俎，而以我爲魚肉。夫一國之財力有限，又詎堪長受外人之剝蝕侵奪，而同時我在外僑民之生活亦日益艱難。又安能長如昔日之接濟本國乎？我同胞識之，今之滅人國者，可以不用鎗炮，但須操縱其經濟，則其國自滅。苟能窮困其百姓，則其種自亡。夫又何必殺戮爲哉？今外人之種種侵略壓制政策，無非欲窮蹙我民之生路。苟我民坐視而不自救，則將來所受之飢寒痛苦，必有甚於今日者。試觀澳洲之黑人，及美洲之紅人，今已滅亡殆盡，而南非洲之黑人，方爲白人所嫉視，急欲設法去之而未得。澳洲英人格而氏 GALLEY 者，全英帝國議員，協會澳洲支部之名譽秘書也。近嘗遊南非洲，見該地之白人，雖有一百五十餘萬名，然尙不及五百五十萬他色人種之多。乃大驚怪曰：「何非洲黑人之多也？苟不設法撲滅，則五十年後，黑人繁殖於非洲，白人尙有立足之地乎？惜哉！今日之無暴主出現，以殘殺此黑人，又惜哉！早年之不足以滅此黑禍也。苟有疾疫發生，則今日醫學之精，足以從速防止其蔓延傳染，而黑人之人數，仍不能大減。奈何奈何！」嗚呼！我同胞聆此，得毋有動於中乎？英國旣征服南非洲，又求滅盡其土人，以便白種人之繁殖其間。其手段之毒，於此可見。吾人試一思之，苟英美諸國在我國得勢，則我民所受之待遇，又將如何？有不遭澳非美三洲土人之厄運者

乎、今者南非英人以亞洲人之在南非洲者、共有十六萬五千人、爲數亦不少、乃日夜憂慮、必欲驅盡亞洲人出境而後已、其焦急嫉忌之狀、大有滅此而後朝食之勢、紐西蘭代表英人某、竟主張將在南非之亞洲人、全數驅逐出境、而澳洲英人格而氏、則主張立法規定、此後凡生長非洲之亞洲人、一滿二十五歲、必須出境、而不得復入、違者施以重刑、嗚呼、英國之咄咄逼人、大有滅盡黃黑諸種人而後已之概、假使吾人不極力提倡愛國主義、致使英美諸國在我國之勢力愈加澎脹、則百年以後、我民將無瞧類、而我民之視外國租界及割據地爲安樂鄉者、亦可以知所戒懼矣、

外人之愛國心

上篇既述外人之侵略政策、以明我國現狀之危險、茲篇略述外人之愛國心、以示外國富強之真因、我國雖云積弱、民氣不振、然而有志之士、實不乏人、聞外人愛國尙武之風、當亦奮然而起、亟圖自強、班仲升之投筆從戎、竟振漢威、祖士雅之中流擊楫、卒復晉土、夫人情莫不貪生惡死、念父母、顧妻子、至激於義理者、則不然、孟子曰、生我所欲也、義亦我所欲也、二者不可得兼、則舍生而取義可也、今者中原鼎沸、外患頻仍、救國之責、正在吾民、非特我國軍人、當慕

名將有勇知方之概，即我平民亦宜厲其尙武精神，共研新式戰術，庶中國之復興可以期之於十年，而外人之侵略亦將徐化爲往事。試觀東鄰日本，現已稱雄於世界，而西方之土耳其亦已勃然有起色，何獨龐大之中國，至今尙奄奄無生氣，須知中華國民非特亟應振興實業，研究科學，又當極力鼓吹愛國主義，使全國人民咸視爲國而死，爲成仁取義，無上光榮，然後可望一洗累朝之國恥，使中華民國挺立宇宙間，而外人之侵略將不足患矣。

今日世界列強，領土之最廣者，當推英國，全球六大洲莫不有英國之屬地，然而英國本國不過區區三島，而竟能興此霸業者，其故安在，非由於其國民愛國敢戰使然耶。當歐戰之時，英國危急，凡在英國之人民，莫不各盡其義務，其愛國尙武之精神，舍身取義之壯氣，莫待言矣。即澳洲諸處之英裔，雖遠在重洋萬里之外，然見宗邦危急，猶復志願從軍，踴躍趨難，以共保其宗邦。自大學師生、新婚少年、富家獨子、宦門驕兒，以至於店夥、廠工、僕役、農夫，莫不踴躍從軍，冒奇險，嘗艱苦，而甘之若飴，此其所以能稱雄於世界也。若我國人民，則多好坐嘆國勢之凌夷，而不知奮起以盡其國民義務，此我國之所以至今而猶衰弱也。假使我國人民皆能效英人尙公尙武之氣，重教育，講公德，昇平之時，則勤勉奉職，一旦國家有難，則義氣奮發，視死

如歸、則夫復何外患之足慮。昔者魯童汪錡、爲國戰死、孔子曰、能執干戈、以衛社稷、雖欲勿殤也、不亦可乎、於此可見聖賢雖諄諄教人曰、「身體髮膚、受之於父母、而不敢妄毀者、孝也。」然當國家危急之秋、則亦未嘗不勉人之殺身以成仁、捨生而取義、而不願見人之臨難而圖苟免、故曰、戰爭無勇、非孝也。夫國家受辱、則其國民必出其死力、以雪國恥、苟力有不逮、則雖暫時忍辱、而實未嘗一日忘之、待時而動而已矣。試觀美國之禁止日人入境謀生、日本人引爲大辱、而誓必有以報之、惜今尙非其時也、然而日本之熱血男兒、竟有剖腹自盡以示其憤慨者、茲事雖屬過舉、於日本無實益、然而日本民氣之激昂、於此可見、甚矣教育之重要也、英國及日本之能有今日者、非教育之功而何、平時學校提倡愛國主義、使兒童之心理、無時不以國家爲前提、而各新聞報館、又從而鼓吹之、使全國人民、皆懷盡忠保國之志、故能一心一意、振興實業、普及教育、研究科學、注重國防、使其國家富庶、軍備完善、他國不敢隨意侵犯焉。

中國之將來

外人之愛國心、既如斯之濃厚矣、我國人之愛國心、則何如乎、上海血案發生之前一年、美國瓦爾博士、嘗對中國學生演說曰、中國之禍患、皆由於國人之無愛國心、而以教育界爲尤甚、

試取中日兩國人民而比較之，則其判異之處，不難立見。日本人無不以國事爲前提，故數十年來，事業勃興。若中國人，則適得其反。云云。此言也。頗似過甚之詞。聽者必謂我人雖缺乏愛國心，但不至與日本人有天壤之別。然吾人試一靜心思之，則博士之言，誠非過當。蓋僅取印度人及中國人而比較之，則吾人又復相形見絀。印度久在英國威權之下，其亡國也，蓋數十年於茲矣。乃至今日，尙有甘地氏諸人，竭力號召其國人，抵制英國貨物，如布疋之類，而同時又極力提倡廣用印度土貨，以養印度失業之工人。其爲國犧牲之精神，普渡印民之壯志，誠足令人肅然起敬。英人雖深忌之，亦沒奈之何。蓋甘地氏愈遭磨折，則壯志愈堅。危難不足以動其心，狴狂不足以懾其氣。吾故曰：印度有愛國志士也。若夫我國，則固尙號稱獨立，而我國民，亦自稱爲明禮識義者也。但中國爲外人所蹂躪者數十年，乃不見有一人如甘地者出而號召國人，作和平之對待法，無怪乎外人見之，而鄙中國人之無勇無義，而又無識也。雖然，我國中優秀分子，懷愛國思想者，證之以滬漢粵血案，實不乏人。特因我國積弱，百端待舉，遂不知從何處着手，又加以以過抱悲觀，無自信能力，遂多以國事爲無望，而袖手旁觀。設使我國有志之士，能知我國人民非無能力，不過待時而動，而我國之前程，正復無限，吾知今之抱悲

觀主義者、行且變爲樂觀、而昨之坐而嘆息者、今且起而力作、萬衆一心、以共盡其國民義務矣、爰特譯外人之曾遊中國者所發言論爲國人告、

澳洲麥爾鉢核露報、調查遠東大事、特別委員、賈烈氏 H. S. GUILLETT. 曾於民國十二年、遊歷中國、及日本、其所發關於中國之言論如左、

「外人之昧於中國情形者、輒以中國爲一紛亂而孱弱之國家、黃禍一談、西人現視爲無稽、然若在中國遊歷數星期之久、則當有所感矣、中國之在政治上及軍事上也、雖屬不足道、然其四萬萬人民之實業、及趨向、行將引起世界各國之注意、而其對於太平洋各國之關係、尤重且大、中國人民、雖尙無領袖、然以經濟之重重壓迫、智識之漸漸普及、謀生者多散往他方、實行殖民、加之以各種實業、亦漸發達是中國之進步、實較外人所料者爲速、中國之在世界、上占重要位置、誠爲時不遠矣、」

賈烈氏又曰、中國百姓、多能知足、中國民族、清爽剛強、苟教之以新式藝術、其前程將不可量、苟其志在雄立世界、其勢力將不可當、斯二者、中國近之矣、及其至也、吾知中國將爲遠東強國、太平洋各國、及歐美諸邦、所不可忽視者也、

英國駐印度陸軍上校波丁格氏、COLONEL POTTINGER 曾廣遊中國、知我國情形甚詳、彼在澳洲麥爾鉢演說時、有曰、

使今日而拿坡崙重生於中國、則十年以內、中國可爲世界頭等強國、此言也、非余憑空所造、蓋中國現多飽學之士、而其洞識西洋情形者、亦以千計、中國又有數百萬之工商諸民、曾享外國民主政治之利益、彼等之鵠望中國與列強並駕齊驅、亦人情所當然也、

現中國有地窄人多之患、而無處可殖民、故必須從速發展、然後可以生存、苟有人焉、出而聯絡四萬萬民衆、使其成一堅固之團體、又復利用其天然之富源、以裕其民生、則中國之富強、可立而待也、

中國之軍人、世人不應輕視、蓋中國軍隊、苟得良將指揮、則亦能如列強軍隊之奮不顧身以報國也、云云、

觀此、則外人之重視中國、誠足令人聞之而驚疑、然彼等皆學識高明、眼界宏遠之徒、其所發言論、皆係從閱歷經驗得來、斷非輕率出言者、可比也、我國人聞之、尙能不重自勉勵乎、

中國人當爲之事

我海內外同胞、既明我國前程之遠大、及現在之險狀、自當各盡其義務、以自拔於水深火烈之中、今者、外人既作經濟上之侵略、我輩自當力加防範、舉凡舶來品之可以用國貨代替者、皆當舍洋貨、而用國貨、以保護我國之實業、兼維持我國農工之生活、此和平之對待法、並非我人創舉、蓋凡外人之富有國家主義者、早已行之於前矣、我國每年進口貨價額、常較出口貨爲多、是以每年之漏卮、多則數萬萬元、少則數千萬元、而外人在我國所設之銀行、保險公司、航業公司等、亦因我人缺乏同胞相助之心、而獲利無算、是以我國人民、僅須保持其愛國熱度、永採自衛之方法、則每年挽回之利權、已不可勝計、而同時又可以維持數百千萬農工之生活、使民各樂其生而安其業、則我國將來之富強、實基於此矣、我國每年之出口貨、強半爲農產品、及原料品、外人之購我農產物也、乃用以補助其農產之缺乏、而其購我原料品也、乃用之以製造精美貨物、反而售之我國、及他國、以獲大利、是以外人之購我貨物、並非有愛於我也、乃以其不至與其國之農工爭利、而有時反能因之而生利焉、假使我國貨物、能奪外國農工之利、則外人早已大增稅率、使我國貨物、雖入其境而無獲利之望、我國之出口貨額、又安能尙有今日哉、是以我海內外同胞、苟長防止外人經濟上之侵略、可以無慮我國出口

貨額之減少、即有之、則亦將由於我國工業之發達、遂能吸收多數之原料、以供製造之用也、綜上以觀、我國人民、救國之道雖多、然收效速、而成功大者、莫如繼續防止外人經濟上之侵略、此事進行之秩序、可略述之如左、

(一) 海內外有志之士、當秉其救國熱誠、極力在學校報館、或聚會之場、宣布外人之侵略、壓制政策、及我國現狀之危險、以激起我民敵愾之心、

(二) 竭力宣傳國家主義、以增進國民之愛國心、

(三) 詳述必須購用國貨之原因、並

提倡此後苟有洋貨與國貨爭利、則當舍洋貨、而用國貨、

(四) 今之亡人國者、可以不用鎗炮、但須操縱其經濟、則其國自亡、苟能窮困其百姓、則其種自滅、是以我民必須襄助本國之航業、及銀行、保險公司等、以防止外人經濟上之侵略、

(五) 我國人民、既自願爲文明國民、對於外人、自當作文明之舉動、

(六) 我國青年、爲保衛祖國、及補助實業計、當多研究科學、以備他日有所發明、及改良各種

工藝品、農產品及軍用品、

(七)我國積弱已甚、不武將亡、是以凡我青年、以干城自任者、當研究海陸軍學、及航空諸學術、

上述種種、若合海內外同胞之力、而實行之、則其收效之大、轉瞬可見、倘能更持之以毅力、圖之於久遠、則十年以內、中國可以富強、如波丁格氏所預言、而外人之嚮以我人爲徒具五分鐘熱心者、亦將大爲驚駭、此所謂不鳴則已、一鳴驚人、不飛則已、一飛冲天者也、海內外有志之士、盍興乎來、

(完)

歡迎轉載

上海圖書館藏書



A541 212 0009 25728

...

